



*The Office Of The Principal and Vice - Chancellor*

**SOLWATI MK MAKHANYA, MPHATSI KANYE NELISEKELA  
LASHANSELA WENYUVESI YASENINGIZIMU AFRIKA  
EMAVI EKUVULA NEKWEMUKELA TETSAMELI, KUGUBHA  
UMKHOSI WELUSUKU LWEKUTALWA LWE-UNISA LWE-145  
ZK MATTHEWS GREAT HALL, THEO VAN WIJK BUILDING,  
EKHEMPASI YASE-UNISA IMUCKLENEUK**

**4 Kholwane 2018 nga-09:30**

- Mcondzisiluhlelo Dkt. Somadoda Fikeni, Umcondzisi: Imiklamo leKhetsekile nemeluleki weMphatsi kanye neLisekela leShansela
- Mhlonishwa, Dkt. Thabo Mbeki, Shansela weNyuvesi yaseNingizimu, mengameli weThabo Mbeki African Leadership Institute kanye namengameli waphambilini waseNingizimu Afrika
  - Mhlonishwa Ndvuna Naledi Pandor, Lilunga lePhalamende,

Indvuna yeTemfundvo Lephakeme Nekucesha

- Mnu. Sakhi Simelane, Sihlalo weMkhandlu wase-Unisa kanye nemalunga eMkhandlu wase-Unisa lakhona lapha
- Bahlonishwa, bokhomishani labakhulu kanye nemancusa lakhona lapha
- Emalunga esigungu sase-Unisa lesiphetse nesebaphatsi labangetiwe
- Mnu. Nkatho, lomelele Mengameli weMKhandlu waVelonkhe Lomelele Titjudeni kanye nawo onkhe emalunga e-NSRC
- Mnu. Mhlungu, Mengameli weMbutzano
- Bameleli labavela kuhulumende wavelonkhe newendzawo
- Emalunga etemabhizinisi
- Bameleli labavela etikhungweni letehlukene netetemfundvo lephakeme
- Litsimba lelitongenela Ikhomfa yeSibonelomnotfo Longenako kanye neKubeka Ezingeni Lelifanele yanga-2018, lengeniswe lihhovisi leMphatsidolobha loMkhulu: Lidolobhakati laseTshwane
- Tisebenti tase-Unisa kanye nebafundzi, kufaka ekhatsi emalunga emndeni wetfu wase-Unisa etigodzini letabelana natsi lomkhosi ngekubukela kusathelayithi
- Baholi betisebenti letihlelekile
- Benamisi betfu, ngitjelwe kutsi, bafaka ekhatsi tisebenti nebafundzi base-Unisa
- Malunga lakhetsekile etetsameli

Tibingelelo tekugubha umkhosi ticondziswe kini nonkhe, futsi sinemukela

ngaletifutfumele kuleliviki lelifanele kutsi libe ngulelibandza kakhulu eNingizimu Afrika kulomnyaka. Ngetsemba kutsi imikhosi yalamuhla itaninika nonkhe kufutfumala kwesikhatsi lesidze. Kantsi-ke futsi, kuko loko kubandza, tiyasitfokotisa sonkhe tindzaba tetimvula lebetidzingeke ngemandla eKapa kanye nekuhhamuleka lokungangabateki kutsi titakunika takhamuti takitsi taleso sifundza.

Futsi-ke kuyo leyo ngcikitsi, akusimatima kangako kuchumanisa loluphawu lwesintfu lwase-Afrika lwetibusiso nekusungulwa kwe-Unisa kulo lona lelidolobha, eminyakeni lelikhulu nemashumi lamane nesihlanu leyengcile. Nayo-ke i-Unisa iyimphahla futsi iyachubeka nekuba yimphahla kanye nesibusiso lesibalulekile savelonkhe. Futsi lapho nginesiciniseko sekutsi sonkhe manje sesiyawati umlandvo we-Unisa lohehanako nalodvumile, kufanele kuphindvwaphindvwe kutsi i-Unisa ingumtali weNyuvesi yaseStellenbosch neyaseKapa, kwatsi ekuhambeni kwesikhatsi, yatala Inyuvesi yaseWitwatersrand, yasePitoli, yaseNatali (UKZN), yase-Orange Free State (i-UFS), iRhodes kanye nePotchefstroom (i-UNW), lekutsi phambilini onkhe bekangemakolishi bekabhalise ngaphasi kwayo. Linyenti lelingakwati kutsi kwatsi lapho hulumende welubandlululo etama kuphocenelela i-Unisa kutsi ibe sikhungo seSibhunu kuphela, lesikhungo sala futsi umphumela waloko kwaba kusungulwa kwenyuvesi leyabitwa ngekutsi yi-Rand Afrikaanse Universiteit, manje seyantjintja seyibitwa

ngekutsi yiNyuvesi yaseJozi. Ngako-ke Shansela, nanoma nje, futsi ngifuna kucaphuna emavini akho Mnu. Shansela, *“ngikhona ngiyaphila (futsi kulengcikitsi kubakhona nekuphila kwetfu) kungenca yekuba khona kwetintsaba netihosha, tintsaba nemakhangala, imifula, tingwadvule, tihlahla, timbali, emalwandle kanye netikhatsi temnyaka letihlala njalo tigucuka letingutona tenta umhlaba wetfu, emanyuvesi lamanyenti eNingizimu Afrika akhona ngenca ye-Unisa! Ngako-ke nginemukela ngaletifutfumele nonkhe balingani betfu ngekwemsebenti lenivela kutikhutikhungo letibodzadzewetfu lenikhona lapha emkhatsini wetfu lamuhla – singumndeni ngalokujule mbamba!*

Kuyacaca kutsi timphandze te-Unisa tenabe tajula emhlabatsini wase-Afrika. Lenyuvesi lena yondliwe - futsi yondliwe – titukulwane tebafundzi letinyenti, lokubonakala kumakhulukhulu etinkhulungwane tebaphotfuli base-Unisa labamelele yonkhe imikhakha emmangweni futsi labatfolakala kuto tonkhe tigaba temmango nakumabhizinisi ahulumende nalatimele emhlabeni wonkhe jikelele – futsi labasebentile babuye futsi batfola emalengiso. Ngicabanga kutsi nitawuvumelana nami kutsi loku kuphumelela lokumangalisako kanye neligalelo lelimangalisako! Futsi namanje liphupho le-Unisa kusesengiko kuba “yinyuvesi yase-Afrika leyakha likusasa ngekusebentela bantfu” - lefinyelelwa ngubo bonkhe labafanelekile kufundza enyuvesi futsi letimisele kusebentela lelive kanye

nalelivekati letfu.

Kepha-ke nine bekunene, lapho sigubha umkhosi wemlandvo wetfu lodvumile kanye nemshiyandvuku, asingakhohlwa ngelikusasa lelidvume ngalokulinganako lesilakhako futsi lesilichubako njengoba sikhuluma nje. Umuntfu angatsembela kulomtselela nekujika kwemshiyandvuku usengakabi ludvondvolo - mhlawumbe futsi lokungaphindze kube sizatfu sekutitsetselela - ngekuswelakala kwembonochanti nekwenta lokutsite lokugcile kulikusasa lelinemdlanla, lelikhicitako nalelisebentako. Uma loko kwenteka, kuwa angeke kuvimbeke.

Kungako-ke utfola kutsi lisu letfu ligcile ngalokucinile ekutfoleni inyuvesi yase-Afrika lengacolisi leyesekeleke yacina futsi lechutjwa tintfo letinsha, kucamba kanye netingucuko leticondziwe. I-Unisa ihlose kuba sinkhonkhwane sekhwalithi nekwenta kahle kakhulu ekufundziseni nasekufundzeni, kulucwaningo nekwenta lokusha kanye nekusebentisana nemmango - ekuholeni embili iNingizimu Afrika nekwentiwa kabusha kwe-Afrika.

Kute sikuzuze-ke loku sitinikele ekusebentiseni emakhono emkhakha lomkhulu walabatsintsekako lesibatfole kutsi banenshisekelo yekudlala indzima ekwakhiweni kabusha kwalelive kanye nelivekati letfu. Ecinisweni, letinhlobonhlobo tebameleli letihlanganyele kanye natsi lapha lamuhla

tikhuluma ngco nembono wetfu wekutsi siyinyuvesi yebantfu ngekwemcondvo lobanti, futsi sitawusebentisana nanoma ngubani umbono wakhe ngalelive letfu nebantfu balo lohambisana nembonchanti we-Unisa. Lapho i-Unisa ingumdlalindzima lomkhulukati *emkhakheni* wetemfundvo lephakeme yaseNingizimu Afrika, siyincenye lebalulekile *yenchubo* yetemfundvo lephakeme eNingizimu Afrika, futsi sisonkhe sifanele kutsi sente siciniseko sekutsi loluhlobo lwengucuko lusiyisa embili ezingeni leiphakeme lesisilangatelelako kanye nemfudvo lephuma embili. Futsi yebo, kusesekunyenti lokufanele kutsi kwentiwe, kepha ngiyatigcabha ngekusho kutsi sicale ngendlela lecinile nalebonakalako yekufezekisa tingucuko letidzingekekako kucinisekisa leto tingucuko.

Sitimisele kakhulu ekutsini sakhele etukwaloko lokwentiwe ngulabo bebangembi wetfu, nekutsi "i-Unisa leluphawu" itawuchubeka itfole kuhlonishwa nekudvunyiswa lekutfole kulo lonkhe lelivekati nakumhlaba wonkhe jikelele.

Futsi yebo, sinaso mbamba sizatfu sekugubha umkhosi! Kuyintfokoto lenguyonayona, ngingasakusho-ke kuhhamuleka, kukhona kutsatsa likhefu, sitfokotele loko lesikuzuzile kuleminyaka le-145 yekuchubeka njalo nekusebenta ngalokungajiki kanye nekufaka ligalelo. Sijabule kakhulu futsi siyatigcabha ngalobuholi bebusikati emmangweni wetfu kanye nekuba yinsika lenkhulukati yekutfutfuka kwetfu kwavelonkhe – beNyuvesi

yaseNingizimu Afrika.

Luhlelo lwanamuhla lutanisika lokunyenti lokujabulisanako futsi lokusifundvo ngalenyuvesi lenhle kangaka kunaloko lengikhona kukusho ngalesikhatsi lesincane lenginikwe sona. Kwenele kutsi ngisho kutsi sikutsatsa njengekuhlonipheka lokukhulu kutsi sibe yincenye yalomndeni lowehlukile kanye nalesikhungo lesehlukile, futsi kuyasitfobisa kutsi nani futsi, ngamunye nangekuhlanga ndzawonye, niyaphindza futsi niba yincenye yeluhambo lwetfu kanye nemshiyandvuku welve letfu, livekati letfu kanye nemhlaba. Siyanemukela nonkhe ngaletifumele kakhulu futsi silindzele lokunye lokufanana naloku.

Ngiyanibonga.